

## JODLERREISE NACH EBBS 2004

S'HET G'RÄGNET SCHO BIM ABSCHIED NÄH  
DIE ERSCHT UFRIGIG HET'S AU GLY GÄH  
**ANITAS** JACKE ISCH NED MIT ÜS CHO  
DE EUGEN HET SIE WIDER MIT UF VILLMERGE GNO  
NACH EM KAFIHALT WIRD GRÄNZE ÜBERSCHRITTE  
UND DE 2. TENOR HET FEINE CHÄS UFGSCHNITTE  
LANGSAM ABER SICHER  
SIMMER DE VERNÄBLET ARLBERG UFGSCHLICHE  
ZUM ECHLY ZYT VERTRIEBE  
VERTEIL ICH BILDLI ZUM BESCHRIEBE  
JEDES SUJET ZEIGT ES LIEDLI ODER E TANZ  
DAS VERLIST EIM S'HIRNI VOLL UND GANZ  
WÄR'S DOCH IMMER E SO STILL BIM PROBE  
GARANTIERT CHÖNNT ICH NID UFHÖRE EUCH Z'LOBE  
BIM USWERTE HANI NED NUR G'STUTZT  
NEI - ES HET MI MÄNGISCH FASCHT VERPUTZT

SO ÖPPE NACH 9 STUNDE  
S'REISEZIEL „EBBS“ ISCH ÄNDLICH G'FUNDE  
JETZ FEHLT NO „S'VERTEILE VO DE BETT“  
ES „TRAUMPAAR“ GIT'S : - WO KEINE LOST.....ABER JEDE REDT!!!  
NACH EM FEINE ÄSSE  
SIMMER GMÜETLICH ZÄME G'SÄSSE  
DE **MORITZ** HET STÄNDIG AM HANDY MANIPULIERT  
DOCH „ORANGES“ HET SYS G'SPRÄCH NED GOUTIERT  
MER SIND DE NO WYTER A SÄLBEM OBE  
I NE BAR - GO D'FÜESS USTOBE  
WIE CHAMER AU STUR A NE WAND UE CHLOPFE  
I HÄTT EM CHÖNNE NO DIE LETSCHTE HAAR US-ROPFE  
D'STIMMIG ISCH GUET, ME CHA LACHE  
ÜBER ALLERLEI LUSCHTIGI SACHE  
IM **DIDI** SINI LAMPESCHIRMLI FÜR'S BÄBIHUS  
SCHWINGE DA WYT OBE US !!!  
APROPOS „SCHWINGER ODER SCHWANGER“ E CHLINERI WORTVERWÄCHSLIG  
DIE NIMMT DE BARKEEPER - DÄ FÄTZE - UF SINI RÄCHNIG

AM NÄCHSTE MORGE, I CHAS CHUM GLOUBE  
D'SUNNE ISCH CHO D'RÄGETRÖPFLI RAUBE  
E GMÜETLICHE MARSCH ZUM HAFLINGER G'STÜT  
VERBY A SCHÖNE HÖF UND HEIMELIGEM CHÜJERGLÜT  
OB HENGST, STUETE ODER FOHLE  
STATT IM STRAU TÜEND DIE DET IM SAGMEHL UMETROLE  
AU RIITSTUNDE HEMMER CHÖNNE GSCHAU  
S'AUGEMERK NATÜRLICH UF DIE „FESCHE“ FRAUE  
GOTTFRIED STÜDLI - HÄND DIE ZWÖI RUNDI FÜDLI.....!!

WYTER GOHT'S IM EILTEMPO  
S'NÄCHSCHTE ZIEL - DE RARITÄTE – ZOO  
VO STINKENDE GEISSBÖCK ÜBER AGRIFFIGI AFFE,  
EXOTISCHE VÖGEL, WO IHRI FEDERE ZÄMERAFFE  
KÄNGURUH, STACHELSCHWEIN, FLAMINGO ODER PELIKAN  
CHINDERSTUND BI DE FAMILIE VOM SCHWARZE SCHWAN  
E NERVÖSE, G'STÖRTE OTTER  
SI EINZIG BOTSCHAFT:.....USE WOTT ER  
BIM USGANG E KRÄCHZENDE SCHREI  
LUEG ZRUGG.....ES ISCH E PRÄCHTIGE PAPAGEI

E RÖSSLIFAHRT DO SEIT NIEMMER NEI  
MIT ME HAFLINGERGSPANN ÜBER STOCK UND STEI  
HERT DE BAYRISCH-DÜTSCHER GRÄNZE NAH  
HEMMER E JUTZ, DRUFABE EN „OBSTLER“ GNO  
ZUM GLÜCK GIT'S EINE WO GUET CHA JOGGE  
SÜSCHT MÜESSTE DIE IM ERSCHTE WAGE AM LÄÄRE DUME SOGGE....  
ABGSPANNT MUES JETZT NO SY  
DE **OSKI** LÄNGT DO TÜECHTIG DRI  
ER ISCH IM ELEMÄNT - ER PRESSIERT  
UND SCHO HET ER DE FALSCH STALL AVISIERT....  
MIR SCHÄTZE DIE ERSEHNTI PAUSE  
GNÜSSET E RICHHALTIGI „TIROLER BRETTEL – JAUSE“  
DE **RUEDI** HET DE CAR ZWÖIMAL I ASPRUCH GNO  
HET ER DOCH SINI JACKE BIM Z'VIERI LIGGE LO

E „GAUDI“ BSUNDERER ART  
HET DE SATTLERWIRT UF DE OBE UFGSPART  
ÜBERALL IM DORF SIND FLYER GSI  
CHUM CHO LUEGE - AARGAUER JODLER SIND AU DERBII  
DE AFANG MACH DE ROBERT - DER BARON  
US ÜBER 10 INSTRUMENT ENTLOCKT ER TON UM TON  
SIS MUNDWERK ISCH SO WAS VO LOCKER  
DE **FRANZ** HOLT DAS FASCHT VOM HOCKER  
DE IIHEIMISCH JODLERSTAR ZABINE - ES HÜBSCHES CHIND  
VERDREIHT ÜSNE MANNE FASCHT DE „GRIND“  
HERRLICH, IHRI FILIGRANE TÖN  
MER LOSE ZUE - S'ISCH EIFACH SCHÖN  
S'WIRD NED NUR G'SUNGE  
NEI, AU TÜECHTIG S'TANZBEI GSCHWUNGE  
DE PRÄSI CHA DA E GSCHICHT VERZELLE  
GÄLL **FREDI** DIE HET DI WELLE  
USGSCHLAGE WIE E JUNGI GEISS  
DIS HÖMLI TROPFET FASCH VOR SCHWEISS  
INZWÜSCHE ISCH AU E BLOSMUSIG ITROFFE  
IHRI PERFEKTION LOHT KEI WUNSCH MEH OFFE  
„BLÄCHHUFFE“ NENNE SICH DIE VIER BURSCHE  
ES TEMPO HEND'S - ALS WÄRE SI AM VERDURSCHE  
KEIS WUNDER - GOHT DA IM **HANS** SYS ÖRGELI FASCHT UNDER.....

SOGAR DE ELVIS HET S'MIKROFON LA DRÖHNE  
SYNI OLDIES - ALL DIE SCHÖNE  
HEND STIMMIG BRACHT IS VOLL LOKAL  
„ZUGABE“ VERLANGET'S AU Z'HINDERSCHT IM SAAL  
VOM SANFTE PRESLEY ZUM „SIGI DER STIER“  
VERZELLT ÄR ÜS „VON SEINEM REVIER“  
DE BARON ROBERT HET'S DE DOCH NO G'FUNDE  
SO TÜEND MER DÄ OBE MIT EM **KUFSTEINERLIED** ABRUNDE

ES PAAR JODLER UND EI ZWE GÄSCHT  
GÖHND AU JETZ NO NID IS NÄSCHT  
HM - E LANDJÄGER - E GENDARM - WÄR JETZ GUET  
D'MARIA ABER NÜT DERGLICHE TUET  
ÜBER SO NE SCHNAPSIDEE CHA SIE NUR LACHE  
TUET LIEBER MIT EM **FANKHUSER HANS** ES TÄNZLI MACHE

DE SAMSCHTIG ISCH E SUNNE – TAG  
DRUM SÖLL LAUFE - WER LAUFE MAG  
UF „D'ASCHINGER – ALM“ - MER HÄND SI DOCH NO G'FUNDE  
NACH ÖPPE.....ZWÖIEHALB HERRLICHE STUNDE  
ES FEINS ÄSSE WIRD SERVIERT  
DRUFABE VOM WIRT ES „SCHNAPSEL“ SPENDIERT“

„DES PASST SCHO“ - NED ABER IM **HANS** SI FINGER  
S'ASCHTLOCH IM GLÄNDER ISCH E CHLI „GRINGER“  
MIT DE SPRACH HET'S SCHO ECHLI G'HAPPERET  
WAS DIE MÄNGISCH ALL'S HEND ZÄMEPLAPPERET  
DE **HANSRUEDI**: „WIR SIND INS AUSLAND GEKOMMEN“ ODER  
DE **ÖSKU**: „ES HAT MIR EINE SAITE GEPUTZT  
DO LUEGT SÄLBSCHT DE ÖSTRICHER ZIEMLI VERDUTZT !!!

GRÜEMT WIRD EUSE JODELGSANG  
AU DE BEIZER VERSPÜRT E DRANG  
SINI GESCHT Z'VERWÖHNE - MIT MUSIG  
D'TSCHINELLE SCHLOT DE CHLY - POTZTUSIG

WYTER GOHT'S ZUR RODELBAHN  
„ZERSCHT E PFAND SONSCHT KEMSCH NID RAN“  
I KURVE LIGE, BRÄMSE, LÖSE DAS GIT Z'DÄNKE  
HERRGOTT HAN **ICH** ARBET BIM RÄNKE  
TUSIG METER ABESAUSE  
I BI FROH HAN I JETZT PAUSE  
KEI PAUSE HET DE **TURI**, EUSE KAMERAMAA  
BIS Z'ABE MUES ER ALLES IM CHASCHTE HA  
DRUM SUECHT ER SICH DE BESCHTI PLATZ  
DERT WÄR'S GUET - ER NIMMT E SATZ  
ABER O WEH, DAS ISCH E SACH  
STATT FOTOGRAFIERE - LIET ER FLACH

DE WALCHSEE E IDYLLISCHI OASE  
LOCKT WASSERSKILER ZUM UMERASE  
SÜNNELE UF EM STÄG MACHT SPASS  
NED LANG UND ÄR ISCH TROPFNASS  
DE **UELI** HET E SCHUFLE GSCHWUNGE  
UND EM **RINI** E GUTSCH WASSER BRUNGE

SO E GARTEBEIZ  
HET HALT SCHO E BSUNDERE REIZ  
UNDER FREIEM HIMMEL ALLERHAND BRICHTE  
S'CHÖME A TAG DIE UNMÖGLICHSCHTE GSCHICHTE  
JÄGERLATEIN ISCH AU DERBII  
ZWE SCHÖNI „GAMS“SIND'S GSY  
WO DIE DREI TIROLER HÄND ABEGSCHOSSE  
NED NUR BLUET - AU RÄBESAFT ISCH RICHLICH GFLOSSE  
DE JOSEF - EHEMALIGE BÜRGERMEISCHTER VO EBBS  
DÄ LUEGT MEH UND MEH ECHLI „SCHEPS“  
HETS ABER NED UNDERLOH  
HINDER SCHNUPFMASCHINE ÄNE Z'GO  
DAS ISCH ES GAUDIMIT DÄM APPARAT  
DE **THOMAS** MACHT JEDEM E LADIG PARAT  
IM NU ISCH DAS PULVER VERFLOGE  
HE, S'WIRD ID'NASE - NED I D'AUGE UE ZOG  
DE „NASEBLOCHER“ VERWÜSCHT AU DIE LETSCHTE SPURE  
SCHO BRINGT E GWALTIGE URKNALL S'NÄCHST OPFER UF TOURE

E WITERI ATTRAKTION - ES FLEUGE-ROULETT  
DIE TIERLI SPAZIERE AM VORHANG ODER AM FENSCHTERBRETT  
„I HA EINI“ GHÖRT ME **PIA** SCHREIE  
NED WARTE - SOFORT UNDER DE ÄSCHEBECHER GHEIE  
S'WIRD G'FIEBERET VOR JEDEM LOCH  
SIE CHUNT - SIE GOHT - D'SPANNIG ISCH HOCH  
LAUF ZUE - I MINI HAND  
DE **SÄMI** HINDERLOT FÜR DICH GÄRN ES PFAND.....

DE **URS** - E ÜSSERSCHT SOLIDE MAA -  
E STILLE GNÜSSER - I CHA IHM EIFACH NÜT VORHA  
ER ISCH HALT NO NED SO LANG DERBY  
WETTE - S'NÄCHSCHT MAL WIRD AU ÄR UNDER DE SÜNDER SY

AM SUNNTIG-MORGE VOR EM CAR  
VERSAMMLET SICH DIE GANZI JODLERSCHAR  
E LETSCHTE BLICK ZUM KAISER - EM WILDE UND EM ZAHME  
ES LETSCHTS BILDLI FÜR I FOTORAHME  
IISTIEGE HEISST'S UND NOMAL WINKE  
BEVOR DIE ERSCHTE GSICHTER I „BART VERSINKE“

ZÜGIG WIRD DE ARLBERG ERREICHT  
UND SIEHE DA.....SCHO WIEDER HET'S G'SEICHT  
IN ST. ANTON E CHLY GO FLANIERE  
DIE LETSCHTE HÄND ABER MÄCHTIG MÜESSE PRESSIERE  
DENN EUSE **ANDY** HETS NED VERTREIT  
DASS ME 10 MINUTE VERSPÄTET GEIT  
DÄ SÖLL LIEBER CHAUFFEUR BLIIBE  
STATT SINI FREIZYT MIT JODLE VERTRIEBE

G'SUND UND Z'FRIEDE CHÖME MER UF MEISTERSCHWANDE  
HÄND ÜS VIER TAG GUET VERSTANDE  
DE **STEFAN** VERDIENT ES GROSSES LOB  
PERFEKT HET ER GMACHT DÄ NID GANZ EIFACH JOB  
IHM GHÖRT EN EXTRAVAGANTE CHLAUS  
„DANKE SCHÖN“ UND NOMAL E HÄRZLICHE APPLAUS

05.09.04

**URSULA MEIER**